



PALAU COMM COLLEGE LIBRARY




T 47098

LIBRARY  
USE ONLY

# Medechiibelau



  
 Micro-P  
 398.296  
 Fau  
 1976



### OMEROLEL A MEDECHIIBELAU

A ta er a klebesei e a ta el buik a mla er a Ngetbang.  
e milrael el mo er a Irrai. A lemerema e ng dikea lode-  
ngelii a lebo er ngii, me ng mocha er a blil a chimo el  
mechas el diak a ngelekel me ng obengkel el kiei. Ngika  
el mechas a dimlak a ko er a ungil el omilkingel ma le-  
chub e ng ungil el omerel el mo er ngii.



Ngika el buik a kmal mlo mekngit a rengul e di liluk e  
meruul a ureor el ko er a mengeluch er a delengcheklel.

A ta el tutau e ngika el buik a mlo olengimes e meruu  
a cheremrum. A lemerema el rrei e ng omdesua el kmo,  
"Msall e ktuu er a aika el ngimes ma bo longang ngika el  
mechas e lkelak me bo el dioll. Mesei el bo el dioll e  
lochellak e bo el betik a rengul er ngak." Tiaikid e a  
lekea el omes ngika el mechas e ng rirellii el kmal mlo keke-  
rei e soiseb er a aika el ngimes. Ngika el mechas a kmal mle meche-  
sang me ng dimlak el lesang. E a lemededesang e ng songerengerang  
me ng mocha ngmai aika el ngimes el mei me ng omengur. Me tia er a  
leka aika el ngimes e ng mlo dioll. E a lemechellang e ng sechal me  
ng milngeklui el Medechiibelau. Ngika el ngalek a di ulemeka a kle-  
besei a kllungel ma delal a kmal mlo ungil a rengul. Ng ulemdasu el  
kmo, "Ng ungia me ng mocha er ngii a nglekek me ng olengeseu er ngak  
e klisechek er a rokui el tekoi.



### MEDECHIIBELAU ER A LOMNGAR

A lklunga ngii el Medechiibelau me bocha el sebechel el ngar er a oderuchel, e a delal a dilu er ngii el kmo, "Rungalek, ak mo er a mesei e kau a mo er a ked me ke meleludeu a idengeled el sengsongd." A Medechiibelau a kilengei e a lorola a delal e ng mocha er a ked me ng mo tmaut el meleludeu el mo er a bita el mo er a bita el ked. E a bocha el kebesengei e ng mocha remei el di chim el diak a ta el idungel el obang.

A delal a okere er ngii el kmo, "Rungalek, ngar er ker a idungel

e kau a merema el di chim? Ak ko er a dilu er kau el kmo ke mo er  
a ked me ke meleludeu a idengeled el sengsongd? Ngera kede mo olab  
el olsiu a keled?"

"E chedei, ngak tia er a kbo er a ked me kuleludeu el mo er a  
bita el mo er a bita, el mo dechor el mo mark e meleludeu e di diak  
a ta el idungel el mei."

"E rungalek, kau ng diak modengei a tekoi? A doleludeu a seng-  
songd e kede mengemcham."

"Me ke dmu el uaisei e chedei, e diak di mdu el kmo, ke melelu-  
deu e le ngak tia el meringel a sengchek er a omeleludeu."

#### MEDECHIIBELAU MA NGELIONG

A lebocha el kukuk e a delal a Medechiibelau a dilu er ngii el  
kmo, "Rungalek, ke kiei er a blai e olsiu a ngeliong e a bo el mark  
e ke <sup>ngisakl</sup> diluir e mecherei ma kmei el ngar er a mesei e ak merakl."

"Choi, morael e ak olsiu er ngii." A delal a milrael e ngii a  
ulelsiu a ngau. A lemereka e ngiluu a idungel el tebechel el nguu

el diluir a chelsel a ngeliong e mecherei. A lebocha el kebesengei  
e a delal a merema el mla er a mesei. Ng ullengull el telkib e  
milkiis el mo merakl a ngeliong. E a lebo e ng dellemakl a idungel  
er a chelsel a olekall el mo er a chutem.

A delal a ulengeroel er ngii el kmo, "Ng ngera me ke oba a idu-  
ngel el mellemakl er ngii er a chelsel a olekall e rungalek?"

"E chedei, ke ko er a dilu el kmo, A lebo el mark a ngeliong e  
ke diluir e mecherei me ak mei e ak merakl? Ngak a di olab a aike  
mdilu er ngak."

#### CHEDENGAL A RRULL

A lklunga el chad e ng mocha sebecel el ngar er a chei el omdoim  
er tir. A ta er a klebesei e a delal a oureng a rrull.

Ng ulker er a delal el kmo, "Ng mo ngera a rrull e chedei?"

"Ng diak, ng ko er a soak el menga chad."

"E ii e chedei? Cherei ma klukuk."


A lebocha el tutau e a resechelil a mlei me te mlo er a chei.

A lemereko el ngar er a chei e ng milkodir a ta er a resechelil e  
nguu el mei er a blil el mecherei er a omball.  
*adehel*

A lemerema a delal e ng dula er ngii el kmo, "Chedil, sekid a  
odimem el ngar er a omball." A delal a kmal mlo ungil a rengul me  
ng ulerreched el mo omes er ngii. Me ng di mlo el osir a diu e me  
dengarech e okerei, "Rungalek, ngera dilu me ke mla mekodir ngika  
el ngelekir a rubliil? Ngera kede mo dmu er a reoungalek er ngii  
ma rebeluu? Ke mera el chebechobel e rungalek."

"E Chedei, ke ko er a dilu el  
kmo, ng soam el menga er a chad?  
A kulmekoad er ngii e le knguu el  
mei el di chad e ng chemiis  
e mo diak dotirii.

"Rungalek, a ng chad  
el chedengal a rrull. Ng  
diak el chad el tireka  
el merael er a beluu."





"E' chedei, me ke smodii el mo ungil e diak di mdu el kmo chad."


MEDECHIIBELAU MA SEMDIU

A kuk ta er a klebesei e a Medechiibelau a dengchokl e orrenge  
er a debusech el melebusech.

Ng ulker er a delal el kmo, "Chedil, sei ng debusech er ker  
ldi kurrenges er ngii?"

"Lak mongerodech e ng debsechel a bekeu el chad er a Ngerduais."

"E chedei, ng techa ngklel ngika el bekeu el chad er a  
Ngerduais?"





"Ng diak kudengeli, e diak a belkul el moker er ngii."

A Medechiibelau a ulemdasu el kmo, "Ngika ng ko el ua techang el chad?"

A lebocha el kukuk e ng milrael el mo er a taoch. E a lebo e ng ngar er ngii a Ngirkosolik er a Ngerengas el melasech.

Ng ulker er ngii el kmo, "Rubak, ng techa ngikei el di mele-busech er a bek el sils?"

"E ng Semdiu er a Ngerduais el ngika el bekeu el chad."

"E rubang, ng diak motekak el mong? Ng soak el mo omes er ngii."


"A kele buik, el ngera kede monguu? E tia el mlik a chemars."

"Kau dorael e ak tingetii a mlim me ng mo diak el chars."

A Ngirkosolik a mocha otebedii a mlil e te melkesang. Me tia er a lorael e ng mle tmuu a daob er tia el chemars er a mlai. A Medechiibelau a ngiluu a ochil el tingetii. E a lengar ku er a euchel e a Ngirkosolik a mesengei a ebeklel el ngar er a ilobech me ng dula el kmo, "A kele buik, msall e deluut el mo mecherei tia el ebeklek e ng remiid."

"Kau dora el e rubang e beskak tia el ebeklem." A Ngirkosolik  
a ngiluu itia el ebakl el msang a Medechiibelau. Me tia er a  
lebsang e ngiluu ltiulechii el bedul a beluu me tia el ebakl a di  
mlo ungil el metecherakl er/blil a chebeklel ngika el rubak er a  
blil er a Ngerengas.

A lebocha er a Ngerduais e te mocha omak er a klubed e ng dula  
er ngika el rubak el kmo, "Ke dikiei er tiang e choielak."



A Medechiibelau a milrael el mo osiik er a Semdiu. A lebo e ng  
ngar er a blil.

A Semdiu er a lesa e ng okere er ngii el kmo, "A kele buik, kau  
ke ngelekel techa el merema er tia el uaisei?" Ng di dilu el uaisei  
e milkiis el nguu a orsul a meluis el nguu el mo merus er a  
Medechiibelau. Me tia er a lebo e a Medechiibelau a di tilechelii  
el nguu el dongerechii e mereberii tia el orsul a meluis el nguu el





mekodir e sola e mo dengchokl er a kingelel e melebusech.

Me tia er a lolebusech e te ~~mlei~~ <sup>mesiou,</sup> a resauluai el olab a

kall. Ng ulmengur e ngoura a debsechel ma kltel a

Semdiu e milrael.

A lemerema er a klubed e ng dula er a Ngirkosolik el kmo, "Doraël e rubang."

"Ng diak el sebechek el mekiis e le ng mla ngmasech a chuld er ngak." A ldela el uaisei e a Medechiibelau a urrekedii a chimal e okisii me te merolang.

Me tia er a lorola e ng dula er ngii el kmo, "Chelechang e ng dikea mNgirkosolik. Ke mo Rechuld e le ng ngilasech er kau a chuld." <sup>most type on rock.</sup>

#### OMELSECHEL A MEDECHIIBELAU

Chelechang e ng kiei ngii el Medechiibelau e mocha mesuub a omelasech ngii ma sechelil er a Ngchei er a ked. Ng mle bek el sils el lebo er a ked me te melasech

e me remei a lekebesengei.

A ta er a klebesei e te melasech e a lomes:er a delsechelel a sechelil e ng ko er a knal klebokel e ungil el lrruul. E a delsechelel a knal kesai e diak el ua aika el delsechelel a sechelil el ungil. Ng ulemes a delsechelel a sechelil e knal sokol. E sei el knal mlo soal a delsechelel el chedeng, e ng di ko er a mle merur el olengit er ngii.

A lebocha el rrei e ng dula er a sechelil el kno, "A klukuk e rrang e a demei me leko er a ulechoid a klokled e ng diak dongerodech e leng kuk mlo kirel el uaisei. Kede dilmuk e ouklalou aikei el ngar er sei el dengar er ngii." A sechelil a di kilengei.

A lebocha el belsechel a cheliuaiu, e a Medechiibelau a dikea bo el bad e di ondikm er a Ngchei el kno ng mla mo imiit a medal ng diak.


e me remei a lekebesengei.

A ta er a klebesei e te melasech e a lomes:er a delsechelel a sechelil e ng ko er a knal klebokel e ungil el lrruul. E a delsechelel a knal kesai e diak el ua aika el delsechelel a sechelil el ungil. Ng ulemes a delsechelel a sechelil e knal sokol. E sei el knal mlo soal a delsechelel el chedeng, e ng di ko er a mle merur el olengit er ngii.

A lebocha el rrei e ng dula er a sechelil el kno, "A klukuk e rrang e a demei me leko er a ulechoid a klokled e ng diak dongerodech e leng kuk mlo kirel el uaisei. Kede dilmuk e ouklalou aikei el ngar er sei el dengar er ngii." A sechelil a di kilengei.

A lebocha el belsechel a cheliuau, e a Medechiibelau a dikea bo el bad e di ondikm er a Ngchei el kno ng mla mo imiit a medal ng diak.





A lomes er ngii e ng milkolk me ng diak el ues a medal  
me ng ulleker er ngii. E a loleker er ngii e ng onger.

A Medechiibelau a mlo bad el telkib e liluut el  
olker, "Ngchei Ngchei Ngchei."

"A uang." A Medechiibelau a mlo bad el telkib e

Ng liluut el olker, "Ngchei Ngchei Ngchei."

"A uang. Ng ngera chised me kede mesululang e ke di olker?"

A Medechiibelau a di mlo bad el telkib e liluut el olker. E a loleker e ng onger el ngor el mesulaul. Taikid e ng di mlo bad el telkib e a lleta el olker e ng mla imiit a medal a Ngchei. Me ng mekisa el mo tuobed. Me tia er a ltobed e ng mlo chemau a blai e milrael el obeteteluut el mo er a ked. Me tia er a lebocha e ng mlo me ng ngongoid e chochoid a kloklor, e ngmai a aike el soal el odak er a kloklor. E a luut er ngii el me remei e ng di ulemekesiu a util a ochil.

A lebocha el tutau e te milkiis e milngedmokl er tir el mo melasech er a ked. A lebocha e a Ngchei a miles a delsechelir el ulechoid e ulengoid, me ng kmal mlo chetil. A Medechiibelau a dilanges a medal a sechelil el ko er a kmal mlo belalk.

Taikid e ng dula er ngii el kmo, "A rrach, cherei e lak el sa el chetim e kau a kmal dachelbai er a omelasech. Me chelecha e ng mo diak mNgchei, e ke mo Dachelbai a ngklem."

A lebocha el kukuk, e a Medechiibelau a ngiluu tia el delsechelel a sechelil el chedeng el mo er a blil me ng mecherei. Ng ulmart er ngii er a delal e leng dimlak el soal a bo lodengalii.


A ta er a klebesei e a delal a mlo er a mesei e ngii a ngosakl a ulaol e sobekii a chemrungel me ng mo daob. Me tia er a lebocha el daob, e ngiluu itia el cheremel el chedeng el orrurt er ngii er a chelsel e otebur me ng mo kolekel. E ngii a remurt el meliuekl el oltoir er ngii el kmal soal. Tia el blai a di mlo dekdekimes a chelsel el rokir. E ng di uchei er sei el lemei a delal, e ng kmal kudmeklii a blai. Ng mlo bek el klebesei el uaisei ma delal a ko er a ngedecha a rengul me ng mocha omdikm er ngii.

A ta el tutau e a delal a di mlo er a mesei e lmuut. E a lemei e ng kuk mla lmuut el ngosakl a ulaol e dolkeklii a



chemrungel me ng obult el mo daob e ng orrurt er a cheremel er  
a chelset.

A delal a dula er ngii el kmo, "A kele ngalek, ke le ke ko el  
dengerenger. Mereched el nguu tia el cheremem el mo choitii. A  
ldu me ng di dekdekimes a blai sei el demei, ke mla nguu ngika el  
matukeoll el me me ke orrurt er ngii. Tia er a lolekinga a delal  
el uaisei, e ng ngoura el mochoitii er a daob.



## MEDECHIIBELAU MA RESEHELIL

A kuk ta er a klebesei e te omesoil e ng milkinga er a delal el kmo, "Chedil, a klukuk e ke mo er a mesei e a omei e ke remuul a okeuik el chelucheb ma titimel e le aki mo milil ngak ma resechelik er a taoch. A delal a kilengei e ko er a di rrau a rengul er ngii el mo milil ngii ma resechelil e ouekau a chelucheb ma titimel.

A lebocha el kukuk e ng mocha remuul a okeuil e ngilai el msang. Aika el okeuil el chelucheb a dimle chechemadech me ng mekekad. A Medechiibelau a dililuk e ngilai el merael. A lemerema er a taoch e a resechelil a mla mong. Ng merola el mo er tir me te chadecheduch e milil. Ma lsueleba e a resechelil a ultobed a kelir el roketa a reua belsiich ma ngikel ma uel ma ulei ma betok el bedengel a kall. E ngii a mocha otobed a kelel el mei me ng mengang. Me tia er a longang, e ng di nguu a chelucheb el loia er a ngerel e nguu a titimel el suchesechii e mereko e merekeklii. Tireka el sechelil a di ulemes e ngibesang

er ngii el ko er a kmal melelolaok a longang.

Tiaikid e te dula er ngii el kmo, "A rrach, ka kuk lemei a aika el kelem me kim charm e kau kuk mcharm a kelam."

Tia er a dela el uaisei e ng ngodubech a kelel er tir e kmo, "Alii e sei el debsa a keled a chad e ng diak deluut el melai."

Tireka el sechelil a kilengei e mocha ngmai aika el kelel el mei me te mengang e tir a odubech a kelir er ngii.

A resechelil a Medechiibelau er a longang aika el kelel e ng mlo mekekad a ngerir ma ngbesir a mereberebet me te mocha



chacherodech. E ngii a okor e ngmai a kelir el mei me ng mengang  
e olsebesebek a medal. A resechelil a di mle chacherodech e di-  
mlak a ngera el ldu er ngii e le ng mla er ngii a tilbilir. Me te  
di mle songerenger e mocha merek el omengur.

A lemereko el omengur e te mocha er a ked me te dengchokl e  
mengaus er tir. Te ulemes el bedul a daob ma aika el chelebacheb  
e mocha kaiueribet er a sebechel el metechii a ulemechelel el mo  
er a Ngerduais. E ngikei el metechii a ulemechelel el mong a nguu  
me ng belual. Te mlo metech a ulemechelir a rebek el chad e ngii  
a kmal mlo uriul. Tireka el sechelil a di mlo ngesonges a otechir  
el rokui. A lebocha el kirel el mo metech e ngii a engelakl a  
chesisbangiau me ng medechemii el sukur er a ngerel.

Me tia er a ldu el kmo, "A rrach mometech," e ngiluu ngika el  
chesisbangiau el ometech me ng suebek el mo er a Ngerduais. A  
resechelil a kmal mlo mechas a rengrir.

Te ulker er ngii el kmo, "E rrang, tia el ulemechelem ng ngera

me ng uaisei el ko er a medeu el mo e mei?"

"Ng diak, a ulemechelek a kuk mo delbard me ng mo klou, e kuk  
mo llemolem me ng mo kekerei me a uchyl me ng ko er a medeu el mo  
e mei."